

تستاهل كل اللي يجرا لك يا ريس



السبت 3 نوفمبر 2012 12:11 م

السيناريست عماد النشار يكتب: تستاهل كل اللي يجرا لك يا ريس

يعني إيه كل يوم تقوم تصلي الفجر وتطلب من ربك العون واللي قبلك كان بيقوم يغير ريقه علي قوت الشعب ويلعب إسكواش ويطلب العون من أمريكا

يعني إيه تلف العالم عشان تجيب استثمارات وفلوس للبلد، واللي قبلك كان من مكانه بيهرب فلوسنا لكل دول العالم

يعني إيه تصلي الجمعة كل أسبوع في محافظة واللي قبلك كان يسحب الحكومة لجامع شرم الشيخ مرتين في السنة

يعني إيه تطلب من الدكتور عبد الرحمن البر إنه ينه علي المصلين عدم التهليل لك احترامًا لقدسية الصلاة، وأحمد نعينع أول ما شاف المخلوع داخل الجامع غير السورة بسرعة وقراله: " والضحى والليل إذا سجي ما ودحك ربك وما قلى " (حصلت أخر عيد أضحى للمخلوع)..

يعني إيه تخطب في الناس بتلقائية وتمكن من اللغة واللي قبلك كان بيهرتل وهو بيقرأ من ورقة

يعني إيه ملم بكل التفاصيل واللي قبلك كان مفيش علي لسانه غير البتاع ده اللي اسمه إيه

يعني إيه ما تستغلش أزمة أبو تريكة مع الأهلي مع أنه بيدافع عن الشهداء واللي قبلك سخر البلد بكل أجهزتها لحل مشكلة الحضري الهارب

يعني إيه كل أسلحة القوات المسلحة تعمل مناورات وتدريبات برًا وبحرًا وجوًا، واللي قبلك شغلهم في البقالة وتسمين العجول وسبوبة عرق الجيش

يعني إيه تتابع الملف الأمني لحظة بلحظة واللي قبلك كان بيطلق البلطجية ينهشوا في عرض الناس ويهدد الناس إما الاستقرار أو الفوضى

يعني إيه الصوامع تتملي رز والجنيه يرتفع ومصر تبقى أول الدول الجاذبة للاستثمار والصفقات في منطقة الشرق الأوسط واللي قبلك كان بيشتتنا كسر الرز بأضعاف تمنه وغرق الجنيه وانتعش الاستحمار ..

يعني إيه تبدأ في تدشين محور قناة السويس لتشغيل 6 ملايين عامل وتعمل مدن علي ضفتي القناة واللي قبلك كان محول المجري الملاحي علي جيبه هو وولاده ..

يعني إيه يكون عندك أربع ولاد منهم واحد متغرب عشان لقمة عيشه واللي قبلك كان عنده ولدين مديهم البلد وضع يد

يا ريس حرام عليك في حد في الدنيا يعمل كده وعنده إعلام لميس والخسيس والدسيس إبليس